



# Biblia Hujifafanua

## Yenyewe

**J**itahidi kujionyesha kuwa umekubaliwa na Mungu, mtenda kazi asiye na sababu ya kutahayari, ukitumia kwa halali neno la kweli.—2 **Timotheo**

**2:15.**

Biblia hujifafanua yenyewe. Andiko linapaswa kulinganishwa na andiko. Mwanafunzi anapaswa kujifunza kuliangalia Neno kwa ujumla wake na kuona uhusiano wa kurasa zake. Analazimika kupata maarifa ya mada yake kuu—kusudi asilia la Mungu kwa ajili ya ulimwengu, ya uibukaji wa pambano kuu, na kazi ya ukombozi. Anapaswa kuelewa asili ya mamlaka hizo mbili zinazopigania ukuu, na anapaswa kujifunza kufuatilia utendaji wao kupitia kumbukumbu za historia na unabii, hata utimilifu mkuu. Anapaswa kuona jinsi pambano hili linavyoingia katika kila awamu ya uzoefu wa mwanadamu; jinsi yeye mwenyewe anavyoonesha mojawapo ya nia mbili zinazopingana kwa kila tendo atendalo maishani; na jinsi gani, atake au asitake, hata sasa anaamua ni upande gani wa pambano hilo atasimama.

Kila sehemu ya Biblia imetolewa kwa uvuvio wa Mungu, na ina manufaa. Agano la Kale, sio dogo kuliko Jipya, linapaswa kuzingatiwa. Tunapojifunza Agano la Kale, tutaona chemchemi hai zikibubujika ambapo msomaji asiyejali hutaona kilicho chema zaidi ya jangwa tu.

Agano la Kale huliangazia Agano Jipya na Jipya huangazia la Kale. Kila moja ni ufufuo wa utukufu wa Mungu katika Kristo. Yesu alidhihirishwa kwa wazee wa imani, kama alivyooneshwa kwa mifano katika huduma ya kafara, kama alivyofunuliwa katika sheria, na kama alivyofunuliwa na manabii ni utajiri wa Agano la Kale. Kristo katika maisha Yake, kifo Chake na ufufuo Wake; Yesu kama alivyodhihirishwa na Roho Mtakatifu, ni hazina ya Agano Jipya. Yote Agano la Kale na Jipya yanawakilisha ukweli ambao utaendelea kufunua vina vipya vya maana kwa mchunguzaji mwenye bidii (Counsels to Parents, Teachers, and Students, 462, 463).

Yesu aliwashutumu wanafunzi Wake kwa uelewa wao wa taratibu.... Baada ya ufufuo Wake, alipokuwa akitembea kwenenda Emau pamoja na wawili wa wanafunzi, alifungua uelewa wao, ili kwamba waweze kuyaelewa Maandiko, kwa hiyo akalifafanua Agano la Kale kwao kiasi kwamba waliona katika mafundisho yake maana ambayo hata waandishi wenyewe hawakuwa wameiona.

Maneno ya Yesu ni mkate wa uzima. Wanafunzi walipokuwa wakila maneno ya Kristo, uelewa wao ulihuishwa. Walielewa vyema thamani ya mafundisho ya Mwokozi. Katika ufahamu wao wa mafundisho haya walitoka kwenye giza la alfajiri hata kwenye miali ya adhuhuri. Ndivyo itakavyokuwa kwetu tunapolisoma Neno la Mungu (The Signs of the Times, Aprili 4, 1906).

Kazi ya kuifafanua Biblia kwa Biblia yenyewe ni kazi inayopaswa kufanywa na wachungaji wetu wote ambao wanauelewa vyema wakati tunaoishi (Letter 376, 1906).